



Sempre cheos de proxectos, de esperanzas e de ilusión navegamos por estes mares e tempos que nos tocaron vivir, dos que non queremos deixar de dar conta. Queremos compartir experiencias, coñecementos, proxectos... todo o que pola nosa parte sexa preciso e necesario para espertar ese pracer pola navegación dos habitantes dunha vila mariñeira como a nosa.

Tamén nós descubrimos un día que o mar non só era un lugar de traballo: descubrimos os praceres das xornadas de salitre e vento, de velas, cabos, varas, vergas, paus e remos, fortes rachas e encalmadas, reparacións e coidados das embarcacións. E tamén aprendemos a respectalo.

Nunha ocasión Mattew, un amigo australiano, contaba que alí os nenos en vez de xogar co balón, xogaban cos barcos no mar. Que era moi fácil acceder a eles porque había moita oferta e demanda de barcos de segunda man. Que a medida que medraban os nenos aumentaba tamén a eslora.

Lástima que non puiden contestarlle: ¡igualíño que aquí! A pesares de estar nós tamén case rodeados de mar.

Máis todo este mundo pode ser unha boliña de neve rodando, con que nós conformámonos con ter unha asociación con barcos de uso común, compartindo singraduras, coidados, obxectivos e paixón.

Só queremos dar constancia das nosas inxedanzas, sentires e saberes deste noso mundo marítimo tradicional, e así empezamos este *Galos nº 1*:

- repasando unha vez máis a historia do nacemento da Asociación
- abrindo un caderniño de embarcacións tradicionais e outros artigos máis técnicos sobre algunha delas: gamela, traíñeira
- artigos literarios escritos por adultos e nenos.
- falamos de novo, como non, do estaleiro de Purro.
- e por suposto, do motivo polo que nace esta revista: o programa do XI Encontro de Embarcacións Tradicionais.

Este ano iniciárase o domingo día 19 de agosto co I Certame de Cancións Mariñeiras interpretadas por distintas corais, organizado pola Coral Polifónica de Bueu. E rematará na seguinte fin de semana, co día grande do Encontro previsto para o sábado 25 de agosto.

Vinde velo.

Vinde vivilo.

Vinde gozalo.

Mentres, nós aquí: sempre cheos de proxectos, de esperanzas e de ilusións seguimos navegando.

